



FEDERALNA UPRAVA POLICIJE



Rad policije Press: 12 PRIJAVLJENIH ZBOG MALVERZACIJA U JP ŽELJEZNICE FBiH

04.06.2011.

Službenici Federalne uprave policije podnijeli su Kantonalnom tužilaštvu u Sarajevu Izvještaj o počinjenim krivičnim djelima **protiv N.DŽ., S.R., S.S., N.L., E.Š., S.M., N.S., Z.V., A.K., N.Č., R.M. i A.H.** zbog postojanja osnova sumnje da su počinili više krivičnih djela. Za prvoprijavljenog do šestoprijavljene postoji osnov sumnje da su zajedno počinili krivično djelo "**Zloupotreba službenog položaja ili ovlaštenja**" (čl. 383 st. 3 u vezi sa st. 1 KZFBiH) i krivično djelo "**Sklapanje štetnog ugovora**" (čl. 252 KZFBiH). Za prvoprijavljenog je utvrđen osnov sumnje da je sam počinio krivično djelo "**Zloupotreba službenog položaja ili ovlaštenja**" (čl. 383 st. 3 u vezi sa st. 1 KZFBiH), kao i da je s drugoprijavljenim zajedno počinio krivično djelo "**Krivotvorenje službene isprave**" (čl. 389 st. 1 KZFBiH). Postoji osnov sumnje da je sedmoprijavljeni počinio krivično djelo "**Pomaganje**" (čl. 33 KZFBiH) u vezi s krivičnim djelom "**Zloupotreba službenog položaja ili ovlaštenja**" (čl. 383 st. 3 u vezi sa st. 1 KZFBiH) i krivično djelo "**Sklapanje štetnog ugovora**" (čl. 252 KZFBiH). Za osmoprijavljenog do dvanaestoprijavljenog postoji osnov sumnje da su zajedno počinili krivično djelo "**Zloupotreba službenog položaja ili ovlaštenja**" (čl. 383 st. 3 u vezi sa st. 1 KZFBiH).

Postupajući po naredbi Kantonalnog tužilaštva Sarajevo, istražitelji Federalne uprave policije su utvrdili da postoje osnovi sumnje da su prvoprijavljeni do četvrtoprijavljenog, kao odgovorne i službene osobe u JP Željeznice Federacije BiH zloupotrijebili položaj i ovlaštenja na način da su postupali suprotno interesima JP Željeznice FBiH čime su omogućili sticanje i pribavljanje protupravne imovinske koristi jednoj firmi iz Sarajeva u ukupnom iznosu od 4.529.785,34 KM.

Prvoprijavljeni, drugoprijavljeni, četvrtoprijavljeni, petoprijavljeni i šestoprijavljena su, kao odgovorne i službene osobe JP Željeznice FBiH, zloupotrijebili službeni položaj ili ovlaštenja na način da su postupali suprotno interesima JP ŽFBiH čime su omogućili sticanje i pribavljanje protupravne imovinske koristi jednoj firmi iz Sarajeva u ukupnom iznosu od 490.321,44 KM.

Također, utvrđeni su osnovi sumnje da su prvoprijavljeni do šestoprijavljene, kao odgovorne i službene osobe u JP Željeznice FBiH, zloupotrijebili službeni položaj ili ovlaštenja, na način da su kršeći Statut JP ŽFBiH i Zakon o javnim preduzećima FBiH omogućili jednoj firmi iz Sarajeva dobijanje kredita u ukupnom iznosu od 8.000.000,00 KM, gdje su za isti iznos opteretili zalogom imovinu JP ŽFBiH.

Istražitelji su utvrdili i osnov sumnje da je prvoprijavljeni, kao odgovorna osoba u JP ŽFBiH, prekoračio granice svojih ovlaštenja što je za posljedicu imalo da za iznos od 8.000.000,00 KM bude opterećena zalogom imovina JP ŽFBiH. Također, utvrđeno je da su prvoprijavljeni i drugoprijavljeni, kao odgovorne i službene osobe, izvršili krivotvorenje jedne odluke u JP ŽFBiH, a što je trebalo poslužiti u svrhu prikrivanja krivičnih djela i počinilaca.

Utvrđen je osnov sumnje da je sedmoprijavljeni, kao odgovorna osoba i vlasnik jedne firme iz Sarajeva, pomogao u izvršenju krivičnih djela odgovornim i službenim osobama u JP ŽFBiH, na način da je izvršio pripremne radnje za izvršenje krivičnih djela, čime je firmi, čiji je stopostotni vlasnik, pribavio protupravnu imovinsku korist u iznosu od 4.529.785,34 KM na direktnu štetu JP ŽFBiH.

Istražitelji su utvrdili i osnov sumnje da su osmoprijavljeni do dvanaestoprijavljenog, kao službene osobe u JP ŽFBiH, zloupotrijebili službeni položaj ili ovlaštenja čime su omogućili pribavljanje protupravne imovinske koristi jednoj firmi iz Sarajeva u ukupnom iznosu od 4.529.785,34 KM na direktnu štetu JP ŽFBiH.